

Concept davart il luf: La moziun Engler mussa la via

(cc) Per la regenza grischuna n'è il sboz per in nov concept davart il luf, ch'è vegnì elavurà da la confederaziun, betg adattà en la pratica.

Las premissas per sajettar en moda facilitada singuls lufs e per reglar ils effectivs da lufs èn formuladas en moda memia severa e cumplitgada. Cuntant na satisfan las mesiras da regulaziun sin basa da donn pli gronds en l'agricultura betg pli al svilup actual cun rotschas lufs. Il sboz dal concept davart il luf è bun per il management da lufs singuls. Nua ch'i èn percunter sa furmadas rotschas lufs cun ina gronda rata da reproducziun, sco al Calanda sur Cuira, sto vegnir prendi en mira urgentamain in nov tractament pragmatic.

Sco che la regenza scriva en sia posiziun a l'Uffizi federal d'ambient (Ufam) stoppia il management dal luf vegnir adattà en il senn da la moziun «Coesistenza dal luf e da la populaziun muntagnarda», inoltrada dal cusseglier dals chantuns *Stefan Engler*. Uschia duain en emprima lingia lufs che han in comportament problematic, ch'èn pauc timids e che van fin en ils abitadis pudair vegnir allontanads en l'avegnir d'ina populaziun da lufs. Tals animals pauc timids èn per regla lufs giuvens. Intervenziuns en questa classa da vegliadetgna èn ina mesira efficazia per limitar la creschientscha da la populaziun da lufs e per promover ch'ils lufs daventan timids envers ils

umans ed ils abitadis. Uschia pudess in ser cuntanscher ina meglra acceptanza dals lufs da vart da la populaziun. La regenza grischuna pretenda energicamain che la moziun Engler e la revisiun parziala respectiva da la lescha federala da chatscha vegnian realisadas svelts.

En detagl ha la regenza resalvas davart differents puncts dal sboz dal concept. Tranter auter sto vegnir schlucada anc pli fitg la premissa per reglar in effectiv da lufs en il territori pertutgà pervia da perditas per la chatscha, e criteris

forestals – p. ex. nagins donn da ruier smesirads en il guaud – ston vegnir stritgads, cunquai ch'i sa tracta da restricziuns supplementaras.

Per il management dal luf dovri tenor l'avis da la regenza da princip pauc, ma simpels e clers criteris per sajettar il luf. Per reglar in effectiv da lufs sto vegnir cumprovada ina reproducziun en la rotscha respectiva. Ils lufs ston lura vegnir sajettads en encliegientscha cun l'Ufam. Ulteriuras cundiziuns restrictivas n'èn betg necessarias.



Co enavant cun il concept davart il luf?